

Forskrift om vern av Vistehorten naturreservat, Vågå kommune, Innlandet

Fastsett ved kongeleg resolusjon 15. august 2025 med heimel i naturmangfoldloven § 34, § 37 og § 62. Fremja av Klima- og miljødepartementet.

§ 1 Føremål

Føremålet med forskrifta er å ta vare på eit område som

- a. har eit særprega landskap med kalkfuruskog, kalktørreng og kalkberg i steppelavelementet
- b. har særskilt betydning for biologisk mangfald ved at det er leveområde for trua og sårbare arter og spesielt for steppe-lav og karplanter.

Det er ei målsetting å behalde verneverdiane i mest mogleg urørd tilstand, og eventuelt vidareutvikle dei.

§ 2 Geografisk avgrensing

Naturreservatet omfattar følgjande gnr./bnr.: Vågå kommune: 190/1, 73/1, 204/1 og 84/1.

Naturreservatet dekker eit totalareal på 269,1 dekar. Grensene for naturreservatet går fram av kart datert Klima- og miljødepartementet august 2025. Dei nøyaktige grensene for naturreservatet skal merkast av i marka. Knekkpunkta skal koordinatfestast.

Verneforskrifta med kart blir oppbevart i Vågå kommune, hos Statsforvalteren i Innlandet, i Miljødirektoratet og i Klima- og miljødepartementet.

§ 3 Vernereglar

I naturreservatet må ingen gjere noko som skadar verneverdiane som går fram av føremålet med vernet.

I naturreservatet gjeld følgjande vernereglar:

- a. Vegetasjonen, medrekna daude buskar og tre, er verna mot skade og øydelegging. Det er forbode å fjerne planter og sopp medrekna lav eller deler av desse frå naturreservatet. Planting eller såing av tre og annan vegetasjon er forbode.
- b. Dyrelivet, medrekna reirplassar og hiområde, er verna mot skade, øydelegging og unødige forstyrking. Utsetting av dyr er forbode.
- c. Det må ikkje settast i verk tiltak som kan endre naturmiljøet, som til dømes oppføring av bygningar, anlegg, gjerde og andre varige eller mellombelse innretingar, parkering av campingvogner, brakker e.l., framføring av luftleidningar, jordkabler, kloakkleidningar, bygging av vegar, drenering eller anna form for tørrelegging, uttak, oppfylling og lagring av masse, utføring av kloakk eller anna form for forureining, etterlating av avfall, gjødsling, kalking eller bruk av kjemiske utryddingsmiddel. Forsøpling er forbode. Opplistinga av tiltak er ikkje uttømmende.
- d. Utsetting av saltstein og føring er forbode
- e. Bruk av naturreservatet til større arrangement er forbode
- f. Bålbrenning er forbode
- g. Telting er forbode

§ 4 Generelle unntak frå vernereglane

Vernereglane i § 3 andre ledd er ikkje til hinder for

- a. sanking av bær og matsopp
- b. jakt og fiske i samsvar med gjeldande lovverk
- c. felling av store rovdyr i samsvar med gjeldande lovverk
- d. vedlikehald av eksisterande bygningar, vegar, traktorvegar, stiar og andre anlegg og innretingar i samsvar med standard på vernetidspunktet
- e. skånsam beiting

- f. forsiktig manuell plukkhogst på gnr./bnr. 84/1 svarande til sona A i vernekart, for grunneigar sin egen bruk av ved
- g. fjerning av vegetasjon langs jordekantar av omsyn til maskinbruk på dyrka mark
- h. drift og vedlikehald av eksisterande energi- og kraftanlegg inkludert naudsynt istandsetting ved akutt utfall eller fare for akutt utfall
- i. oppgradering eller fornying av kraftleidningar for heving av spenningsnivå og auking av linetverrsnittet, når tiltaket ikkje skadar verneverdiane angitt i verneføremålet nemneverdig.

§ 5 Regulerings av ferdsel

All ferdsel skal skje varsamt og ta omsyn til vegetasjon, dyreliv og kulturminne.

I naturreservatet gjeld følgjande reglar om ferdsel:

- a. motorisert ferdsel til lands og i vatn er forbode, medrekna landing og start med luftfartøy.
- b. Sykling, riding og bruk av hest er forbode utanom eksisterande vegar.

§ 6 Generelle unntak frå ferdselsreglane

Ferdselsreglane i § 5 er ikkje til hinder for gjennomføring av militær operativ verksemd og tiltak i samband med ambulanse-, politi-, brannvern-, rednings- og oppsynsverksemd, samt gjennomføring av skjøtsels- og forvaltningsoppgåver som er bestemt av forvaltningsstyresmakta. Unntaket gjeld ikkje øvingsverksemd.

Ferdselsreglane i § 5 andre ledd er ikkje til hinder for

- a. motorisert ferdsel på eksisterande bilveg
- b. landing og start med Forsvaret sine luftfartøy
- c. naudsynt motorferdsel i samband med drift, vedlikehald, akutt utfall eller fare for akutt utfall på eksisterande energi- og kraftanlegg i anlegget sitt naturlege bruksområde. Ved bruk av motorisert transport skal det i etterkant sendast melding til forvaltningsstyresmakta.
- d. naudsynt motorferdsel for uttransport av sjuke og skadde bufe. Køyretøy som blir nytta skal vere skånsamt mot markoverflata. Det skal gjevast melding til ansvarleg oppsyn for verneområdet før køyring skjer.

§ 7 Spesifiserte dispensasjonsreglar

Forvaltningsstyresmakta kan etter søknad gi dispensasjon til

- a. istandsetting, vedlikehald og skjøtsel av kulturminne.
- b. naudsynt uttransport av felt elg og hjort med lett beltekøyretøy
- c. avgrensa bruk av reservatet for aktivitetar nemnt i § 3 andre ledd bokstav e
- d. avgrensa tiltak i reservatet for å forhindre større skader på omkringliggende skog
- e. oppsetting og vedlikehald av gjerder
- f. oppgradering av eksisterande energi- og kraftanlegg og fornying av kraftleidningar som ikkje fell inn under § 4 bokstav i
- g. naudsynt motorferdsel i forbindelse med oppgradering og fornying av eksisterande energi- og kraftanlegg

§ 8 Generelle dispensasjonsreglar

Forvaltningsstyresmakta kan gjere unntak frå forskrifta dersom det ikkje strir mot føremålet med vernet og ikkje kan påverke verneverdiane nemneverdig, eller dersom omsyn til tryggleik eller omsynet til vesentlege samfunnsinteresser gjer det nødvendig, jf. naturmangfoldloven § 48.

§ 9 Skjøtsel

Forvaltningsstyresmakta, eller den forvaltningsstyresmakta bestemmer, kan setje i verk tiltak for å oppretthalde eller oppnå den natur- eller kulturtilstand som er føremålet med vernet, jf. naturmangfoldloven § 47.

§ 10 *Forvaltningsplan*

Det kan utarbeidast forvaltningsplan med nærare retningsliner for forvaltning av naturreservatet. Forvaltningsplanen kan innehalde nærare retningsliner for gjennomføring av skjøtsel.

§ 11 *Forvaltningsstyresmakt*

Statsforvaltaren i Innlandet er forvaltningsstyresmakt etter denne forskrifta.

§ 12 *Ikraftsetjing*

Denne forskrifta trer i kraft straks. Samtidig blir forskrift av 9. juli 1993 nr. 660 om vern av Vistehorten naturreservat, Vågå kommune, Oppland oppheva.